



ISTITUT CULTURAL LADIN
Majon di Fascegn

Sèn Jan di Fassa, ai 28 de november 2018

COMUNICAT STAMPA

Istitut Cultural Ladin CALANDÈR LADIN 2019 e MEDIATECA LADINA Prejentazion del nef Calandèr Ladin e de la novitèdes de la Mediateca Ladina

Mèrtesc ai 4 de dezember 2018 – da les 17.30 aló dal Museo Ladin, Sala Luigi Heilmann

L'Istitut Cultural Ladin "majon di fascegn" aur endò i ujes del Museo Ladin con n nef event. En mèrtesc ai 4 de dezember da les 17.30 vegnarà prejentà dantfora l **Calandèr Ladin 2019** dessema ai **neves prodoc de la Mediateca Ladina**, la piataforma web per la difujion del lengaz ladin.

L **Calandèr Ladin 2019** é stat realisà enche chest an de gra al didament tant de la Coprativa Val de Fascia de Sèn Jan che de chela de Ciampedel, sostegnidores prezioses de chesta opera che encomai da passa 40 egn rua te la cèses de la jent de Fascia e te la scoles.

Chest an la tematica l'é i **Leghes da mont**, n percors che ne porta a amirèr valgugn di più bie leghes de la Dolomites, compagné da la poejtes per ladin de Alberta Rossi. L calandèr é stat realisà con fotografies che vegn fora dal concurs fotografich endrezà del 2018 da la Pro Loco de Vich dal titol "Èga te mont", realisèdes da fotografes da chiò entorn e no demò: Marco Corriero da Funes, Lisa Bolzan da Limon sul Garda, Diego Leder da Busan, Rossana Viola da Pèdua, Vincenzo Lancella da Ravenna, William Preite da Monticello Conte Otto (Vicenza), Mauro Morando Panet da Pardac, Alessia Bortolameotti da Trent, Marco Migliardi da Cortina, Alberto Zanoli da Castelfranco Emilia (MO), Selena Chinnici da Legnano e da Massimiliano Grisanti da Sèn Jan.

La **Mediateca Ladina**, la se smaora vigni an con neves prodoc interatives ouc tant a tegnir sù e valorisèr l lengaz, che a meter a la leta materièi utoi per l'ensegnament e per la promozion del lengaz, tant te la scola che ti percorsc de alfabetisazion di gregn.

Te chesta ocasion vegnarà prejentà la neva sezion "**Ones** | Ladin te radio", che ades regoi i programes radiofonics de la rubrica "L Segnaliber", realisé per "Radio Studio Record" en colaborazion co l'Union di Ladins de Fascia e dediché a autores e operes segnificatives de la produzion leterèra ladina da n'outa e d'aldidanché, per zirca 30 ores de programazion; na maniera neva per scutèr sù plates de letradura compagnèdes da tòc de musega de coment e ambientazion.

N'otra neva te chesta direzion l'é enche l'audioliber **L Saut de Giòchele te la libertà**, n test umoristich de Hugo de Rossi del 1922, coi dessegnes de Claus Soraperra, jà oget de na publicazion te la Colèna "Contaconties": n test piäjegol, caraterisà da n lessich rich e enteressant, che vegn prejentà con n glossèr pop-up che fornesc la spiegazion de la oujes più curioses e che no se दौरa più trop.

Per l'ocasion se pel **vijitèr debant l Museo** da les 15.00 a les 19.00 e **compèr valguna de la publicazions de l'Istitut a n priesc rebassà**, desche l nef volum "Scritores Ladins - Materièi per la storia de la letradura ladina de Fascia" de Fabio Chiocchetti che perferesc, aldò del stil classich del liber su papier, n strument prezios de consultazion sorida olà troèr tesç e informazions de la desvaliva tapes che, dal prum de l'Otcent en ca, à vedù l ladin fascian fèr sia aparizion tel panoram de la letradura ladina.

N apuntament da no perder mèrtesc ai 4 de dezember del 2018. Duc é envié.

AR